

LITURGI NATAL KELUARGA

GBKP RG. BATAM CENTRE TAHUN 2015

Tema : *“Kuikutken peraten Tuhan” (bnd. Lukas 1:38).*

Sub Tema : *Gelah kerina anggota jabu nggit ipake Tuhan guna ngelai i tengah-tengah gerejaNa*

Keterangan : “L” e me Liturgos bage pe renungan ibabai Bapa i tengah jabu. “P” e me Perpulangan. Ende-enden, tedis ras kundul isesuaikan ras situasi i bas masing-masing jabu.

1. PENDILO GUNA MUJI TUHAN

Orang tua : Marilah kita nembah Tuhan alu ukur meriah dingen ngatakan bujur sebab Ia nggo reh ku doni enda guna nelamatkan kita.

Anak-anak : Payo. Tuhu patut kel Tuhan e sipuji ban keleng ateNa si mbelin si nggo nelamatkan kita. Alu arih ersada sipuji Tuhan arah Natal Keluarga enda.

2. RENDE KEE 139:1-3

3. BERITA KERNA SURA-SURA DIBATA

“Ola kelengi doni enda entah pe kai si lit i bas doni enda. Sabab adi kelengindu doni enda la ikelengindu Bapa. Kerina si lit i doni enda, si mengga ate kalak perdosa e me kai si idahna janah ngena atena seh maka man bana atena, ras kai si lit i doni enda erbahanca meganjang ukur kalak; si sada pe labo reh i bas Bapa nari, tapi i doni nari. Doni ras kerina isina masap kap pagi; tapi si ndalanken peraten Dibata nggeluh kap rasa lalap” (1 Joh. 2:15-17)

4. RENDE PEE 74:1,2

5. PENGAKUN DOSA

Bapa : Tuhan alemi aku megati riahen kuakap ndalanken hobiku asangkan muji Kam; nonton bola, ercatur, ergame. Tupung iingetkenNdu tanggung jawabku guna mabai jabuku erkebaktin keluarga aku pe mekisas. Menam kerina waktuku guna kesenanganku saja.

Nande : Alemi aku Tuhan menam lupa kekelengenNdu sibuk ngurus diriku ras keluargaku saja, piah la nai lit waktuku guna muat bagin bas dahin gerejaNdu. Riahen kuakap

pulung ras teman-temanku ercakup-cakap asang pulung ngorati kataNdu piah kerehenku bas PA Moria pe enggo jarang.

Anak : Aku pe alemi Tuhan. Melala waktuku terbuang guna dahin si sia-sia meriah-meriah ras teman, i bas medsos aku eksis tapi bas Tuhan lang. Aku kerah secara rohani padahal gegehku simpar ibanNdu. Alemi aku kurang mediate kerna dahin gereja.

6. RENDE SEE 182:1-3

7. BERITA KERNA KELENG ATE DIBATA (NATAL)

L : Marilah sipuji Tuhan Dibata Ia reh ndahi bangsaNa janah mulahisa.

P : Rende SEE 146

L : IberekenNa man banta penebus si erkuasa, bagi nggo nai ikatakenNa nai-nai nari arah nabi-nabiNa sibadia.

P : Rende SEE 146

L : Erpadan Ia mulahi kita ibas musuh-musuhta nari bagepe ibas kuasa si erelem-elem man banta. IbahanNa kita badia dengen bujur ilebe-lebeNa ibas gedang-gedang geluhta.

P : Rende SEE 146

L+P : Dibatanta perkeleng dengen perkuah ate. IsehkenNa man banta sinalsal keselamatanen.

8. NAGANI LILIN

Bapa/Nande : Seh paksana kita Nagani Lilin Natal enda sebab Tuhanta nggo reh ku doni nerangi kegelapen doni enda. E maka rende kita i bas KEE 115:1,2.

9. KOOR (ADI LIT)

10. RENUNGEN (IBENAKEN RAS IDUNGI ALU PERTOTON)

Renungen Teks Alkitab i bas Lukas 1:26-38

Erpengendes man Tuhan e me salah sada tanda sekalak jelma erkiniteken man Tuhan. Kalak si erpengendes man Tuhan tek ia maka keleng ate Tuhan man bana ras kerina si iban Tuhan e guna kiniulinna. La lit sitik pe keragunna adi ras Tuhan. Contoh si mesunahna ngidah kalak erpengendes e me sekalak anak ras nandena. Anak e yakin kel maka keleng ate nandena man bana e maka la ia mbiar lalap ia tenang adi ras nandenalah ia. Labo ia peduli

lit bahaya entah kebiaren i sekelewetna sebab idahna saja pe nandena nggo erbanca ia teneng.

I bas nats renungenta siidah Maria tuhu-tuhu erpengendes man Tuhan. Tuhan erban rencana gelah reh penampat doni enda (Anak Dibata) e me jadi sekalak manusia bas rencanaNa e perlu la kula Maria jadi nande man Tuhan. Mehuli me kula Maria, nina malaikat Tuhan. I je Maria patuh ras epengendes man Tuhan aminna i bas si e melala resiko si ialaken Maria, kemungkinen mela ngenen jelma si enterem sebab statusna si nguda-nguda denga, ngukurken ukur Jusuf sebagai tunangenna, hukum kalak Jahudi banci erbanca Maria ibenteri i darat kuta sebab sekalak si nguda-nguda si mehuli kulana langa ia erjabu tentu banci ituduh enggo erlua-lua. Si e kerina banci erbanca Maria la nggit ndalanken sura-sura Tuhan adi Maria sekalak si la tek ras la patuh man Tuhan. Tapi ban kiniteken Maria man Tuhan la ia sangsi guna ngueken sura-sura Dibata.

Kerina sura-sura Tuhan iueken Maria janah icidahken Dibata maka la lit si erbanca Maria kemalun. Tetap Tuhan natang-natang Maria. Bas kepatuhen Maria ia iergaken seh asa sendah i ja lit gereja i je tersinget gelar Maria sekalak diberu si patuh man Tuhan.

Kalak si erpengendes man Tuhan la pernah kemalun sebab keleng ate Tuhan man anak-anakNa e me sada kepastin. Kalak si erpengendes man Tuhan ibanna Tuhan si ngaturken geluhna, patuh ia man Tuhan janah metedeh ia ndahiken dahi-dahin Tuhan sebab sura-surana pe menyenangkan ukur Tuhan.

Melala kalak si ngaku tek man Tuhan erpengendes man Tuhan i bas paksa mindo ngenca, adi lit sura-surana Tuhan nina tapi tupung Tuhan ndilo ia guna nehken sura-suraNa la ia nggit.

Tuhan enggo ncidahken keleng ate si mbelin man banta alu kerehenNa ku doni enda tentu selaku mahluk si rukur kita beluh ngataken bujur. Pengataken bujurta e me alu nggeluhken geluhta bagi si ngena ateNa bage pe alu nggit muat bagin i bas gerejaNa guna nehi sura-sura Dibata. Bagi Maria la pernah sangsi guna ngikutken peraten Tuhan bage min kita kerina la sangsi ngaloi pendilo Tuhan ikut i bas rencana Tuhan. Adi nggit kita ngueken pendilo Tuhan guna muat bagin bas rencanaNa labo banci kita kemalun isampatiNa nge kita, ras lalap kita ijagaiNa. Resiko si lit nggo leben iidahNa ras la pasti erban cara gelah la kita kemalun. Ula ukurta gulut adi isuruh Tuhan ndalanken rencanaNa tapi ngataken bujurlah sebab labo lalap

lit kesempatana janah labo ka kerina jelma ndatken kesempatan e.
Adi kita isuruhNa uekenlah ras ula tertaren-taren.

11. PENGAKUN KINITEKEN

12. PERSEMBAHEN

Kata Dibata si jadi palasta maba persembahen; Roma 12:1b
“Endeskenlah kulandu man Dibata saja selaku persembahen si
nggeluh rikutken si ngena ateNa. Sabab bageme arusna kam
ersembah man Dibata sue ras biakndu selaku mahkluk si rukur”.
Nehken persembahen janah rende SEE 156:1-

13. PERTOTON PERSEMBAHEN RAS SYAFAAT.

14. TEKAD

L : Kita enggo ipilih Tuhan jadi si kerajangenNa labo
erkiteken kebeluhen ras kepentarenta tapi erkiteken
perkuah ateNa, e maka patut kita ngataken bujur man
baNa. Ikut muat bagin bas mpebelangken Berita si Meriah
ras ndahiken dahin-dahin gereja em termasuk
pengataken bujurta.

Nande : Tuhan Kam empuna geluhku, pakelah aku sue ras
rencanaNdu.

L : Sangap kalak si nggit ipake Tuhan i bas nehken sura-
suraNa, kerinana icukupiNa guna nehken sura-suraNa e.

Anak : Sampat aku Tuhan guna patuh man banDu, si man
lawanenku peraten dagingku ras pengajuk doni enda.

L+P : Meriah kel ukur kami iatanken Tuhan kami i bas nehken
sura-suraNa. Mulai bas wari enda ate kami nggit muat
bagin bas dahin-dahin gereja guna nehi sura-sura Dibata.

L : Bas kiniulin Tuhan si mbelin e patut maka lalap la
ndatken puji-pujin bas gedang geluhta ras erberita man
doni enda gelah kerina doni pe muji la. Arah kita rende pe
banci kita erberita gelah kerina sinasa lit muji Tuhan,
sipuji la arah KEE 193:1-2.

15. PERTOTON TUHAN